

Iluarsiissut

Matumani oqallisissiamut akissuteqaat 12.novemberiminngaanneersoq taarserneqarpoq

(Oqaaseqatigiit kingullit allannguuteqarlutik)

Inuit nappaammik eqqorneqarsimasut oqaaseqartartoqalersinnaaner at pillugu apeqquteqaat aallaavigalugu oqallinnissamik siunnersuut**Akissuteqaat**

(Peqqissutsimut, Isumaginninnermut Inatsisinillu Atuutitsinnermut Naalakkersuisoq)

Siullermik Inatsisartunut ilaasortaq Jess Svane, Siumut, Naalakkersuisut qutsavigaat nappaammik eqqorneqarsimasunut oqaaseqartartoqalersinnaaner at pillugu oqallinnissamut siunnersuuteqarsimammat.

Siunnersuuteqartup naggasiutitut apeqqutigaa peqqinnissaqarfimmi ilumut pissutsit taamaaginnassanersut imaluunniit pissutsit pitsanngorsarneqarnissaaanik periarfissaqarnersoq. Naalakkersuisut isumaqarput peqqinnissaqarfimmi sinaakkutigineqartut periarfissaatitaasullu iluanni ineriartorneq ingerlanneqartoq. Naalakkersuisut oqallinnissap pisariaqartinneqarnera isumaqatigilluinnarpaat, tassami massakkut peqqinnissaqarfimmi sullinneqarnermut sulisoqarniarnermullu atugassarititaasut oqallisiginissaat pingaaruteqarmat pisariaqarlunilu.

Naalakkersuisut erseqqissaatigerusuppaat inerisaanissamut pitsanngorsaanissamullu sulerusussuseq amigaatigineqanngimmat. Peqqinnissaqarfimmi atorfeqartut tamanit amigaatigineqarnerat ilisimaneqarnikuvoq.

Nakorsat eqqortumik piginnaanillit peqqissaasut peqqinnissaqarfimmi sulisut allat atorfinitsinneqarnissaat ajornakusoorpoq sulisussarsiornermullu nukippassuit atorneqarput. Sulisussarsiornermi unamminartut maannamut sullissinnermut neqeroorutigineqartunut sunniuteqarput. Assersuutitut taaneqarsinnaavoq qanittumi Aasiaat qitiusutut napparsimavittut ernisussanut sullissinnermut allannguuteqarallarnissaa nalunaarutigineqarpoq. Naalungiarsuit toqusarnerannut annikillisaaniarnermut anguniakkatut siunniussat attatiinnarneqarnissaat anguniarlugu Peqqinnissaqarfik Disko-mi ernisussaagaluit ilaat Ilulissanut erniartortalissapput.

Taamatut inissisimaneq aallavigissagaanni maannakkut siunissamilu Naalakkersuisut iliuusissatut pingaarnarpaat qulakkeerinninnissamut suliniutit pingaarnersarivaat sulisussanik naammattunik ilinniartitsineq, peqqinnissaqarfimmi sulinnissamik pilerisaarineq nunatsinniiginnartitsinerlu. Ilaatigut inuuneqqortusiartornitta kingunerisaanik peqqinnissakkut suliaqartunik pisariaqartitsineq ukiuni aggersuni annertusiartuaarnissaa naatsorsuutigisariaqarpoq. Taamaattumik peqqinnissaqarfippu sulisullu ullut tamaasa sulisut annertuumik suliaqartarnerat qujarutigisariaqarpagut. Taamaasillunilu Naalakkersuisut naak atorfinitsiniarnermut unamminartoqaraluartoq peqqinnissaqarfik ineriartortuarnissaanut pitsanngorsarnissaanullu qulakkeerniartuartaqarpaat.

Nappaatigigajunneqartut soorlu uummalluutit, kræfti, gigti il.il. oqallisissiami eqqartorneqarput. Nuannerpoq napparsimasut kattullutik peqatigiiffinnik assigiinngitsunik pilersitsisoqarsimammat, taakkumi tusaaniarneqarnissaq tamanullu oqallissaarisarnissamik siunertaqarput. Takorloorneqarsinnaavoq peqqinnisaqarfiup peqatigiiffinnut suleqateqarnera pitsanngorsarneqarsinnaasoq ineriartortinneqarsinnaasorlu. Taakkuuppummi misigisat misilittakkallu nalituut pitsanngorsaannissamut tunngavissaasinnaasut.

Innuttaasut napparsimasullu ullumikkut sullissinermut passunneqarsimanermullu naammagittaalliorsinnaapput. Tamanna pissutigalugu peqqinnisaqarfimmi pitsanngorsaannissamut tunngavissaqarput. Peqqinnisaqarfimmi 2017-mi sullissinermut pingaaruteqarluinnartumik napparsimasunut siunnersortimik pilersitsisoqarpoq. Siunnersorti 2017-mi 500-nik saaffigineqarsimavoq taamaammallu aaqqiissutip atorluarneqarneranik ersersitsilluarluni. Kissaatigineqarpoq siunnersorteqarnerup ineriartorteqqinneqarnissaa taamaasilluni napparsimasut sulii annertunerusumik oqaloqatigineqartarsinnaaniassammata. Saniatigut aamma

2018-imi septembarimi Nunatsinni Nakorsaaneqarfik Peqqinnisaqarfik suleqatigalugu maalaarutit misissorneqarnissaat aallartinneqarpoq, taamaaliortoqarporlu peqqinnisaqarfimmi kiffartuussissutit kukkussutaasut aallaavigalugit pitsanngorsarniarlugu.

Napparsimasunit peqqinnisaqarfimmi sullissinermut naammagisimaarinninnermut nalilersuinerulik misissuineq 2019-mi ingerlanneqassaaq. Misissuinerup inerneru suliniutit pitsaassutsip qaffassarnissaanut anguniakkanut suliniutinut tunngaviliisuussapput.

Taakkartorneqartut tunngavigalugit Naalakkersuisut oqallisissiami tunngaviusut taperserpaat, peqqinnisaqarfimmi sullissinermut atuisunullu attaveqartarnermut tunngassuteqarmata. Naalakkersuisut taamak oqariartuuteqarlutik oqallinnissaq tikilluaqqaat neriutiginneqarlunilu peqqinnisaqarfiup pitsaaqutai taakkartorneqarumaartut.